

Morning Dogri (NSD) National News Bulletin 21-06-2025

- प्रधानमंत्री नरेन्द्र मोदी होरें अज्ज विशाखापत्तनम च 11में अंतर्राष्ट्रीय योग दिवस दी अगुवाई कीती।
- आपरेशन सिंधु तैहत् 500 थमां मते भारतीय नागरिकें गी ईरान थमां सुरक्षत वापस आह्नेआ गेआ।
- रक्षा मंत्री राजनाथ सिंह होरें गलाया ऐ जे आपरेशन सिंदूर आतंकवाद दे खलाफ भारत दे नमें धेइयै गी दर्शादा ऐ।
- मौसम विभाग नै मध्य प्रदेश, चार प्रदेश ते देश दे चार पूर्वी इलाकें च अज्ज भारी बरखा दा अंदेशा जताया ऐ।
- नीरज चोपड़ा होरें पेरिस डॉयमंड लीग 2025 च सुन्ने दा तगमा जित्तेआ ऐ।
- पैहले टेस्ट मैच दे पैहले दिन शुभमन गिल ते रिषभ पंत दी शानदार बल्लेबाजी करी भारत नै 3 विकेटां मुआइयै 359 रंज बनाए।

<><><><><><>

PM Yoga Day

अज्ज पूरी दुनिया बड़े जोश ते जज्बे कन्नै 11मां अंतर्राष्ट्रीय योग दिवस मनाया जा'रदा ऐ। बड़्डे बड़्डे संस्थानें थमां स्थानीय पार्कें तगर लोक किट्ठे होइयै योग करा'रदे न ते योग दे समोध ते शारीरिक मानसिक नरोएपन दे सनेएँ गी जन-जन तगर तगर पजा'रदे न। इस ब'रे योग दिवस दा विशे सार ऐ "इक्कै धरत इक सेहत लेई योग"। प्रधानमंत्री नरेन्द्र मोदी होरें अज्ज बडलै विशाखापत्तनम-आंध्रप्रदेश च 2 लक्ख 72 ज्हार शा बी मते लोकें कन्नै योग करियै राष्ट्रीय सतह दे इस समारोह दी शुरूआत कीती। एह आयोजन विशाखापत्तनम दे आर.के.बीच थमां भोगपुरम दे 26 किलोमीटर दे दायरा च लगा।

<><><><><><>

Gujrat Yoga

गुजरात च 11में अंतर्राष्ट्रीय योग दिवस आला आयोजन प्रधानमंत्री नरेन् मोदी हुंदे जन्म स्थान वादनगर च शर्मिष्ठा झीले दे कंडे लगा। मुख्यमंत्री भूपेन्द्र पटेल एहदी अगुवाई करा'रदे न।

इस मौके पर खेड़ड राज्य मंत्री हर्ष सिंघवी ते सेहत मंत्री ऋषिकेश पटेल हुंदे अलावा दूइयां बड्डियां हस्तियां बी शामिल होई दियां न। गृहमंत्री अमित शाह अहमदाबाद च योग प्रोग्राम च हिस्सा लै'रदे न।

<><><><><><>

Punjab Yog

पंजाब दे बक्ख-बक्ख जिलें च अंतर्राष्ट्रीय योग दिवस बड़े जोश कन्नै मनाया जा'रदा ऐ। सीमा सुरक्षा बल नै पंजाब च अपनिएं सब्बने युनिटें ते मुख्यालयें च "एक पृथ्वी-एक स्वास्थ्य के लिए योग" विशे पर योग दिवस मनाया। मुख्य समारोह अटारी, अमृतसर दी सांझी चेक पोस्ट पर लग्गा। सीमा सुरक्षा बल पंजाब फ्रंटियर दे आईजी डॉ. अतुल फलजुले होरें आखेआ जे इस आयोजन दा मकसद सीमा सुरक्षा बल दे जोआनें गी बन्ने आले ग्राएं च रौहने आले लोकें कन्नै जोड़ने दा बी ऐ हा।

<><><><><><>

Nadda Yog

बीजेपी दे अध्यक्ष ते केन्द्रीय सेहत ते परोआर कल्याण मंत्री जे.पी.नड्डा होरें अज्ज 11में अंतर्राष्ट्रीय योग दिवस दे मौके पर नमीं दिल्ली दे कर्तव्य पथ पर योग कीता। इस मौके पर उनें आखेआ जे योग आत्मा गी परमात्मा कन्नै मलाने दा इक्कै-इक साधन ऐ। श्री नड्डा होरें रोजमर्रा आले जीवन च योग दी महत्ता पर लोह पांदे होई सब्बनें गी अपील कीती जे ओह सेहतमंद जीवन जीने लेई योग गी अपनान।

<><><><><><>

Srilanka Yog

श्रीलंका च 11मां अंतर्राष्ट्रीय योग दिवस एतिहासक इंडिपेन्डेन्स स्कायर च मनाया जा'रदा ऐ। इस आयोजन च 1 ज्हार शा बद्ध लोक ते 100 शा मते योग सखाने आले माहिर शामिल होआ'रदे न। श्रीलंका सरकार दे केई सिनियर मंत्री क्रिशान्थ अवेसाना, उप-स्पीकर रिजवी सलीह, साबका क्रिकेट खडारी, उद्योग पति शामिल होआ'रदे न। इस प्रोग्राम दा आयोजन भारती उच्च आयोग आस्सेआ कीता जा'रदा ऐ। एह्दे अलावा श्रीलंका दे राजनायिक दफतरे आस्सेआ गेल, कैंडी ते जाफना च बी योग दिवस मनाया जा'रदा ऐ।

भारती उच्च नै श्रीलंका दे आयुर्वेद विभाग कन्नै रलियै 19 जून गी श्रीलंका दे सब्बने आयुर्वेद संस्थाने च 117 प्रोग्राम करियै रिकार्ड कायम कीता ऐ।

<><><><><><>

Op Sindhu

ईरान थमां भारतीयें गी वापस आहने लेई तुर्कमेनिस्तान दे अशगाबात थमां इक विशेष जहाज अज्ज बडलै नमीं दिल्ली पुज्जेआ। एहदे कन्नै गै आपरेशन सिंधु तैहत अजें तगर ईरान थमां 517 भारतीयें नागरिक अपने मुख्य परतोई आए न। इजराइल ते ईरान बश्कार चला'रदी तनोतनी कीह बिगड़दे हालात गी दिखदे होई भारतीय नागरिकें उत्थुआ सुरक्षत बाहर कड्डने लेई आपरेशन सिंधु शुरू कीता गेआ हा। जंदी रातीं 290 भारतीय नागरिकें गी लेइयै इक जहाज नमीं दिल्ली पुज्जेआ। एह अभियान दे इक हिस्से दे तौरा पर ईरान च स्थिति भारतीय दूतावास भारतीय नागरिकें गी सुरक्षत क्षेत्र च भेजने, उंदी भारत वापसी च पूरी मदद करा'रदा ऐ।

<><><><><><>

Rajnath

रक्षा मंत्री राजनाथ सिंह होरें गलाया जे आपरेख्शन सिंदूर नै आतंकवादिएं ते उंदे संरक्षकें गी इक जबरदस्त सनेया दित्ता ऐ जे नमां भारत हुन आतंकवाद दा शकार नेई होग , सगुआं पूरी तगड़ेयाई ते रणनीति कन्नै एहदा मुंह त्रोड़ परता देग। कल जम्मू कश्मीर दे उधमपुर च उत्तरी कमान दे जवानें कन्नै गल्लबात करदे होई रक्षा मंत्री होरें पाकिस्तान ते पाकिस्तान दे नाजायज कब्जे आले जम्मू कश्मीर च आतंकी ढांचे गी नश्ट करने च सशस्त्र बलें ते खुफिया अजेंसिएं दी सटीकता ते बहादुरी दी सराहना कीती। उनें जोर देइयै आखेआ जे आतंकवाद खलाफ भारत दी नीति च बदलाव इस बेजोड़ बहादुरी ते लगन दा नतीजा ऐ। रक्षा मंत्री होरें सिंदूर अभियान गी छड़ी इक कारवाई नेई सगुआं बन्ने पारां आतंकवादिएं ते आतंकवाद दे समर्थन करने आले लेई इक बड्डी चेतावनी ऐ।

<><><><><><>

IMD

भारतीय मौसम विभाग नै अज्ज मध्य प्रदेश, पूर्वी उत्तर प्रदेश ते देश दे उत्तर पूर्वी इलाकें च भारी बरखा पौने दी संभावना दस्सी ऐ। अज्ज छत्तीसगढ़, पंजाब, झारखंड, अंडमान निकोबार, हिमाचल प्रदेश, उत्तराखंड, हरियाणा, चंडीगढ़, पच्छमी उत्तर प्रदेश ते पूर्वी राजस्थान च भारी बरखा दी मेद ऐ। कोंकण, गोवा, मध्य महाराष्ट्र ते गुजरात च बी अज्ज हल्की थमां भारी बरखा दी पेशगोई कीती गेदी ऐ। मौसम विभाग नै केरल, लक्ष्यद्वीप, कर्नाटका दे समुंद्री इलाकें ते तेलंगाना च बी बरखा पौने दा अंदेशा ऐ।

<><><><><><>

FIH

एफआईएच हॉकी प्रो लीग 2024–25 च भारतीय मर्द ते महिला टीमां अज्ज ते कल डबल्स हैडर च बैल्जियम कन्नै मकाबला करगंन। लगातार 6 बारी हारने मगरा हुन भारती मर्दे दी टीम बैल्जियम कन्नै मकाबला करोग। बैल्जियम अंक तालिका च त्रीये थाहर पर ऐ। भारतीय महिला टीम बैल्जियम खलाफ जित्त दी पूरी मेद करोग।

<><><><><><>

Neeraj Chopra

भारत दे नीरज चोपड़ा होरें पेरिस डायमंड लीग जैवलिन थ्रो प्रतियोगिता जित्ती लैती ऐ। कल रातीं स्टेड सेबेसचियन चार्लेटी च आयोजित प्रतियोगिता च द'उं बारी दे ओलपिक पदक विजेता नीरज होरें 88 इशारिया इक-6 मीटर दी दूरी पर नेजा सुट्टियै एह खताब जित्ती लैता। जर्मनी दे जूलियन वेबर 87 इशारिया 8-8 मीटर दे अपने सर्वोत्तम प्रयास दे कन्नै दुई ते ब्राजील दे लुईज मौरिसियो 86 इशारिया 6-2 मीटर दे कन्नै त्रीऽ थाहरै पर रेह।

<><><><><><>

Cricket

क्रिकेट च भारत ते इंग्लैंड बश्कार एंडरसन-तेंदुलकर ट्रॉफी दे पैहले टैस्ट मैच दे पैहले दिन कल भारत नै त्रुं विकटें दे नुक्सान पर 359 रंज बनाए। लीड्स दे हेरिंग्ले च अज्ज भारती कप्तान शुभमन गिल 127 ते उप कप्तान ऋषभ पंत 65 रंजें शा अगगे खेड्डगंन।

कल यशस्वी जायसवाल नै 101 ते के.एल.राहुल नै 42 रंजें दी पारी खेड्डदे होई भारत दी शानदार शुरूआत कीती। मैच दे दुए दिन दा खेड्ड अज्ज भारती समे मूजब दपैहरी साढ़े 3 बजे थमां शुरू होग।

<><><><><><>